

TIMOTeyON ISTE I

Tauamboen chiaid

1 ¹Pabado nebi. Nuquin Papa yacno yuedanquidën Esuquidistun: —Ëbi chuiubeneta —caidquio nebi. Aton Mado tantiasho nuqui bëdamboen isquidën Nuquin Papan: —Con Mado Esus chuiubeneta —caidquio nebi. ²Ëmbi chiondac Esus tantiabenash con mado icbobimboecquid mibi neque. Mimbi iste nëid dada uanu. Mibi tantiec: —Nuquin Papan aton Mado Nuquin Icho Esuquidistubëdtan con mado bëdamboen isquin bëdambo icmepashun —quiobi.

Chiaid utsi chienda, quequin chiaid

³Tantia. Mibi chuinu, mado. Nidaid utsi Masedonia caid yacno nidquin ëmbi chuibidanondacpadquiec Epeso yacno icta. Mibi yacnocquidon: —Nuquin Papan chiaidquio chuinu —queboedombi aidquio chienquio icsho naden chuita. —Nuquin Papan chiaid chuiquimbi chiaid utsibëdta nactsusuaquin Nuquin Papan chiaid chienda —cata. ⁴Nadembidi chuibanta. —Tsusedpabon ambembi chiampiduidi chiec tabadenda. Adembidi utsibon: “Nuquin matsesën mado nepampic. Aidën bababic nadec cuëmëdpampic. Aidën tsyuecquiduidtsëqui bëdambo iquec,” quequin dadpenquio ambembi chuibampac caosh. Aden chiaiduidi tantiec tabadenda —cata. —¿Adenuidi

chuiquinda mimbi Nuquin Papan chiaidquio bëdamboen tantiemepe? Adenuidi chuiquin mimbi Esus tantiamenquio iquec. Aden mimbi ambembi chiaid chuisho tantiash: “Mimbi icsamboen chiec. Ëmbimboen bëdamboen chiec,” quec mibëdi chushcananeque. Nuquin Papan chiaidquien chuitiad —cata. Nuquin Papan chiaid bëdamboen chienquio icquido aden chuita. ⁵Adshumbic aidobidi naden chuita. —“Matses ma bëdamboec tantiananu,” quequin Nuquin Papan chiaidquio chuita. Adoac bëdamboen tantiashun Esus tantiec bëdamboec tabadec matses bëdamboec tantianantsiash —cata, mado. ⁶Mimbi aden chiacpadomboen nainquio icquidoen Nuquin Papan chiaid bëdamboen tantienquio yec abembi onquec. ⁷Adquidon: —Nuquin Papan ambi chiaid Moises dada uamepampid bëdamboen tantiembi. Moisesën chiampicpadomboen namenuc aid chuibanquid icte bunebi —queboedombi Nuquin Papan chiaid bëdamboen tantienquio icquin icsamboen chiec.

⁸—“Naden nata,” quequin Nuquin Papan chiaid Moisesën dada uapampid icsambo iquec —¿quequindambi chie? Padenquio. Ma aidi bëdambo iqueyoc. —Nëid tantiashun ma abi icsaid ënu —qeshun aid abimbo chiac bëdambo ictsiash. ⁹¿Bëdambo icquid chuiquinda

Nuquin Papan Moises dada uamepampic? Padenquo. Icsambo icquido chuiquimbien adopampic nadquido chuiquin. Nèidic Nuquin Papan chiaid niac-niacquido. Nèidic aton chuiquidën chiaid niac-niacquido. Nèidic Nuquin Papa tantiesabo. Nèidic Nuquin Papa mamënshunquido. Nèidic anibi cuesunequido. Nèidic amëbi cuesunequido. Nèidic cuesunianquido. ¹⁰Nèidic aton chidopenquo chudquido. Nèidic aton bënëpenquo chudmequido chido. Nèidic aton chido bunenquo yec dada daëd chichudnanquido. Nèidic matses utsi bedshun yuaquido. Nèidic muaquido. Nèidic Nuquin Papan chiaid niac-niacquido utsibotedi. Adquid matses icsambo icquido chuiquin Nuquin Papan chiaid Moisesën dada uapampic. ¹¹Adembidi Esus chuibenequidon: —Adquid icsambo iquec —quequin chiec. Bëdamboshë icquin Nuquin Papan aden Esus chuibenequido chuimec. Esus chuibenequidbidi icquin adembidi chiemi.

**Nuquin Icbon Pabado
bëdamboen isbenaïd**

¹²Tantia, mado. Mibi chuinu. Nuquin Icho Esuquidistun: —Pabadon ëbi bëdamboen chuibantsiash —quequin tantiashun: —Ëbi chuibenequid icta, Pabado —queshun ëbi bëdamboen namec. Adoaid icquin: —Ëbi namequid yec mibi bëdamboshë iquec, Icho —quequin Nuquin Icho Esus chianembi. ¹³Ënden adenquo iccondabi. Nuquin Papan Madopenquo danquin Esus icsamboen chuishunondambi. Abi tantiaquido chieshënquin cuesun secate bunondabi. —Aton Mado Esus tantiasho Nuquin Papan ëbi bëdamboen istsiash —quenquo icquin adopondambi. Adshobini: —Pabadon abimbo tantiabi

iquec —queshun Nuquin Icbon cuidenquo icpanëdash. ¹⁴Adec icsambo icquid icsho Nuquin Icbon tantiamic: —Abi tantiasho ëbi bëdamboen isbentsiash —quequin Esusquio tantiabenondambi. Esus tantiaquin matsesten tantiaquiemi.

¹⁵Tantia, mado. Naden chiaid bëdambo iqueque. —Icsambo icboedën abi tantiasho cuidmenquo icnuec Esus matsesac caondash —quequin chiaid bëdambo iquec. Ëbibil icsamboshë icpondabi. Utsibon Nuquin Papan chiaid bëdiactsëc niac-niacnubi ëmbimbo comapenen niac-niaccondambi. ¹⁶Adec ëbi yuec icsambo icsho Nuquin Icho Esusën baded cuidenquo icquin abibi tantiaquid bëdamboen isbempondashi. —Pabado bëdamboen isaid chiac utsibo: “Pabado icsambo icboedi Nuquin Papan bëdamboen isbenac. Adembidi Esus tantiasho Nuquin Papan ëbitsen bëdamboen isendac,” quequin ëbi tantiendac. Adquid unësacsho ëbi yacno tabadmendambi —queshun abi tantiaquid Esusën bëdamboen isbempondashi. ¹⁷Aden tantiaquin nadoembi. —Nuquin Papa ambiuidtsëqui abitedi namequid yec abitedishun Icbombo nec. Unëstiapimbo icquid nec. Isadenquo icquid nec. Adquid abentsëcquiobi icnuc abipadquid utsi nibëdec. Adquid icsho abitedishun: “Mibi bëdamboshë iquec, Papa,” capashun ënenquo icquin —caimbi.

**Matsesën mibi
chiondacadombota, quiaid**

¹⁸Mibi con mado icbobimboecquid neque. Ëmbi chiacpadomboen Nuquin Papan chiaidquo chuibanta, mado. Ënden mibi Esus chuibanquid yanabi icnuc Nuquin Papan oncamiac

nuquibëdtan Esus tantiaquidën mimbi chuibante chuipondash. —Esus bëdamboen chuibanquin Timoteyon Esus tantiaquido bëdamboen namendac —quequin mimbi chuibante chuipondash. Aidën chiacpadomboen chieshtoenquo icquin Nuquin Papan chiaidquo chuibanta. ¹⁹Aden Nuquin Papan chiaid niaquenquo icquin Esus tantiaquie bëdamboec tabadta. Utsiboen adenquo iquec. Icsamboec tabadquin Nuquin Papan chiaidquo niac-niacquin Esus tantienquo yanosh. ²⁰Adecandedo caidbëdtan Imeneyo caidën aden Esus tantienquo yanosh. Aid daëdshun Nuquin Papa muauaquin icsamboen chuisho nadopombi. —Adquid Satanasën natiambo icmepashun —qeshun: —Esus tantiaquido cho-choacno choenda —capombi. —“Nuquin Papa muauachitombi. Icsambo icchitebi,” quequin ma tantianu —qeshun adopombi.

Nuquin Papa bëdamboen chianete chiaid

2 ¹Tantia. Utsibotedi chuinu. Matses abitedi tantiaquin Nuquin Papa chianenuna. —Matses abitedi min Mado Esusbëdta mibi bëdamboen tantiaquie bëdamboen ista, Papa. Matses nashunquidquo yec mibi bëdamboshë iquec, Papa —quequin Nuquin Papa chianenuna. ²Adembidi Nuquin Papa chuiquin: —Chuiquid dapambo pedesidente caidtedibëdta chuiquid dapa utsibotedi bëdamboen tantiameta, Papa. Adoac aidon bëdamboen namiac cuesun secananenquo yec matses abitedi bëdamboec tabadtsiash. Adnubi abi chieshënuquido nibëdnuc Esus tantiaquido abi tantiec bëdambo ictsiash, Papa —quequin Nuquin Papa chianenuna. ³—Con matses Esus tantiameta, Papa —quequin nuqui aden

chianesho tantias: —Bëdamboen chiech. Ëbi bunaidquo chiech —quendac Nuquin Papa nuqui cuidenquo icquin abëd tabadmequid. ⁴Matses abitedimbo cuidenquo icnuen matses bëdamboen iste bunquid yec: —Ma ëmbi chiaid tantiasun abided cuidadec unësaid ma tantiapanu —quec Nuquin Papa. ⁵Nuquin Papan chiaidquo tantiasun nuqui naden tantiec. —Nuquin Papa matses uaquid abentsëqui icnuc abipadquid utsi nibëdquie. Abëd icboedi matsesun: “Nuquin Papapadquid icquin aid tantiaquid nebi,” quequin aton Madon matses chuipanëdash. Adecbidi aton Papa matses bëdamboen ismequid yampanëdash Esus. Aid abentsëqui Nuquin Papa bëdamboen ismequid nec. ⁶Abi tantiaquid cuidmenquo icnuec abided cuidadec unëspac caondash —quequin chiaidquo nuqui tantiec. Nëbien Nuquin Papan tantiacpadomboen matsesën aden chiaidquo chuiben-chuibenec. ⁷Adomboembidi Esus chuibenecquidquo nebi. —Matses utsibo isadaidpembo ëbi chuibeneta —Esusën caondaid nebi. Adoaid icquin: —Ma Esus tantianu —quequin Nuquin Papan chiaidquo chuibenec nebi. Abimbo caimbi. Adquid nebi.

Esus tantiec cuëdënacnoshon nate chiaid

⁸Tantia. Dadatedi chuinu. Cuëdënacno puduedshun Nuquin Papa chuinnec bëdamboequien tabadtad. Nëish bëdanash chieshënanenquo icquimbien Nuquin Papa chuitiad. ⁹Chidobotsen chuinu. Esus tantiec Esus tantiaquido cuëdënacno nidnuec: —Mabi isnu —quequin tantienquo yec bëdamboec dasiuidta. Bëdamboec tabadquid dasiuidacimboec dasiuidta. Chido chishpidabimboec dasiuidenda. —Mabi isnu —quenquo yec Esusquo

tantianuec Esus tantiaquido cuëdënacno puduedta. ¹⁰—Mabi isnu —quequin tantienquo yec: —Nuquin Papa tantiaquidquo nebi —quec utsibo nashumbanec bëdamboec tabadta.

¹¹Esus tantiaquido cuëdënacnoshon dadan Nuquin Papan chiaid chuibansho tantiaquid chidon. —Aidën chiapadomboen natiapimbo iquebi —quequin tantienquo yec bëdamboen tantie otacquo tabadquid chido. ¹²Esus tantiaquido cuëdënacno puduedshun dada chuibanesa chidon. Adembidi dada ancaisa chidon. —Otaquien tabadquid chido —caimbi. ¹³Dada Adan caidba Nuquin Papan matses uapampic. Adshumbic aton chido Eba caidtsen. ¹⁴Aden dadabëdta chido nacnenacsho isumbien Satanasën: —Icsamequin tanu —queshun muauac icsaquin chidomba Nuquin Papan chiaid niacpampic. Adan padabi. Aden tantiaquin: —Dadan chido chuibanquid —caimbi. ¹⁵Adec abia icsasho isun Nuquin Papan cuidac paëmbo icnuc bacuë tishquid chido abitedi nec. Nëbi Esus tantiaquid yanash ambi tishaido bëdamboen namequid nendac. Esusën chiapadomboen natiadquo icquin matses tantiaquid nendac. Nuquin Papan chiaid niaquenquo icquid nendac. Aton bënëuidtsëqui chudmequid yendac Esus tantiaquid chidon. Adquid Nuquin Papan bëdamboen isquin abëdi tabadmendac.

Esus chuibanquid chiaid

3 ¹Tantia. Utsitsen mibi chuinu. —Esus chuibanquid ictiadquo iquebi —quesho: —Bëdamboen nate mibi bunec —cata. ²—Nuquin Papan chiaid chuibanquid nadquien ictiad —quequin anocquido chuita. —Bëdamboec tabadquid nec —utsibon caidquo Nuquin Papan chiaid chuibanquid nendac. Adquid chido

abentsëc inquid nendac. Abi bunaid ënshun mëmunquidquo nendac. —Bëdamboen tantiaquidquo nec —utsibon caidquo nendac. Isedanquido bëdamboen isquid Nuquin Papan chiaid chuibanquidën. Nuquin Papan chiaid bëdamboen tantamequin chuibanquid nendac. ³Tantiadenuen acte paëmbo icquid aquenquo icquid nendac. Badedquo nëishenquo icquid nendac. Uimanëmënenquo icquid nendac. Chushcananteuidi bunenquo icquid Nuquin Papan chiaid chuibanquid. Piucquid bedteuidi bunenquo icquid nendac. ⁴Aidën chiapadomboen aton chidon aton bacuëbobëdta naquid. Chieshenquo icquin aton papan chiapadomboen naquid aton bacuëbon. ⁵¿Ambi chiapadomboen aton chidobëdta aton bacuëbo bëdamboen namenquo icquinda Esus tantiaquido bëdamboen namepatsiashe? Padenquo ictsiashe. ⁶Ënden Esus tantiabenondaid chuiquin: —Ëbi chuibanquid icta. Ëbi bëdamboen chuiquin ëbi bëdamboen nameta —Esus tantiaquidon cac bëdambo ictsiashe. Nëbimbo Esus tantiabenquid aden chienda. Chuibanquid icmiac adquidën Nuquin Papan chiaid badedquo niactsiashe. Satanasbimboec: —Ëbiuidtsëqui bëdamboshë iquebi —quetsiashe. Adquid: —Ëbi chuibanquid icta —cainda. ⁷Ënden Esus tantiabenondaid mibi chuibanquid icmenun Esus tantiesabon: —Bëdambo icquid nec —casha tantia. —Icsambo icquid nec —caid chuibanquid icmenda. Adquid chuibanquid icmiac icsasho Esus tantiesabon mamëshuntsiashe. Adquid Satanasën badedi yuatsiashe. —Icsambo icquid nec —caid: —Ëbi chuibanquid icta —cainda.

Esus tantiaquido nashunquid chiaid

⁸Tantia. Esus tantiaquido nashunquidtsen chuinu. —Nuqui

chuiبانquidën chiacpadomboen ëbitedi nashunquid icta —quequin nadquid chuïta. Utsibon: —Bëdambo icquid nec —caidquio nendac. Muesambo nendac. Tantiadenuen acte päëmbo icquid aquenquio icquid Esus tantiaquido nashunquidën. Piucquid bunquin ampenquio icquid nendac. ⁹Nuquin Papan chiaïd bëdamboen tantiaquinc Esus tantiaquinc caic bëdamboec tabadquid Esus tantiaquido nashunquid. Adquid bëdambo ictsiash. ¹⁰Esus tantiaquido nashunquid icmenuen: —¿Bëdambo icquidida nëïd nec? —quequin chuïmiac utsibo: —Ai, bëdambo icquid nec —abitedi qesho tantiashun: —Esus tantiaquido nashunquid icta —cac bëdambo ictsiash.

¹¹Adquidën chido: —Bëdambo icquid nec —utsibon caidquio nendac. Utsi icsaïduidi chienquio yec bëdamboec tabadquid adquidën chido. Tantiadenuen acte päëmbo icquid aquenquio icquid aton chidon. Ampenquio yec bëdamboec tabadquid. Adquidquio Esus tantiaquido nashunquidën chido bëdambo ictsiash. ¹²Esus tantiaquido nashunquidën chido abentsëqui inquid. Ambi

chiacpadomboen aton chidon naquid. Adembidi aton bacuëbon. ¹³Abi nashunquidën Esus tantiaquido bëdamboen nashunsho isun utsibon bëdamboen isendac. Adoaidën dayacquio icquin abi utsibo nashumbanquin dacuëdenquio icquin Esuquidistu tantiamendac. —Esus tantiaquido nashunquid adquidquio iquendac —quequin ënquin chiombi.

¹⁴Tantia. Utsi mibi chuïnu. Mibi yacno nëbi nidiadquio iquebi. —Nidenquio icmane —qeshun nëïd dada uaic nebi. ¹⁵Ëbi mibi yacno badedquio nidabi icnuc: —“Esus tantiaquidon nadoquid,” quequin

Pabadon chiacpadomboen nanuna —cata. ¿Ttsutsi tantiaquido nuqui nepe? Unëstiapimbo icquid Nuquin Papambo nec. Aid tantiaquido yec shubu abentsëquën tabadquidobimboec nuqui iquec. Adquid icquin Nuquin Papan chiaïdquio tantiaquin nuqui Esus chuïbenec. ¹⁶Ëndenquio abi bëdamboen ismequid ambi tantiamiabi icnëdaïdi nëbi Nuquin Papan tantiamiaïd Esus bëdamboshë iquec.

Aid Nuquin Papan
matsesmepanëdash.

Nuquin Papan Mayanën: “Nuquin Papapadquidquio icsaisambo Esus nec,” quequin tantiamec.

Matsesën unës uaqi uincuenaid yec Nuquin Papan abi yacnoshon uaido mayan bëdabon isaidquio Esus nec.

Abi chuïbenequidën nidaid utsi-utsiec yacno nidshun chuïbeniac utsin-utsinquien Esus tantiabenac caosh.

Aidquïobi Nuquin Papan abuc nidmeshun abëdi tabadmeoapanëdash.

Utsibon icsamboen chiaïd

4 ¹Tantia, mado. Nuquin Papan Mayanën tantiamiaïd mibi chuïnu. —Esus chote nëbi icnuc abi tantiaquidon utsin-utsinquien Esus tantienquio yanendac. Satanasën yuabo podobitsi icsabon muaquin pausunac matsesën chuïsho tantiashun Esus tantienquio yanendac —quequin Nuquin Papan Mayanën abimbo tantiamioshi. ²Aden muaquidon: —Abimbo caimbi —quequin bëdambo icquid damianquien aden muaquin chiendac. —Nuquin Papan cuidnushe —quequin tantienquio iquendac. ³Adquidon naden chiendac. —Dadan chido bedenda. Chidon dada bedmenda.

Padenquoio yec tabadta —quequin icsamboen chiendac. Adembidi: —Aidquoio petemaid neque. Penda —quequin pete abentse-abentsen chiendac aid pete bēdambo icnubi. ¿Atotsi quequin Nuquin Papan pete uapampic? —Ēmbi chiaidquoio bēdamboen tantiashun Esus tantiaquidon: “Nuquin Papan pete uaid bēdambo iquec,” quequin ma penu —quequin Nuquin Papan pete uampic. ^{4,5}Aidēn pete uaidtedi bēdamboshē iquec. —Ēmbi pete uaid bēdambo iqueque. Ma penu —queshun Nuquin Papan pete icmiaid ma petequid neyoc. —Mimbi pete uaid bēdambo iquec, Papa —queshun pete isuidenquoio icquin penuna.

**Esus chuibanquid icquin
bēdamboen nata, quiaid**

⁶Esus tantiaquido ěmbi chuibocpadomboen chuibanquin mimbi bēdamboen natsiac, mado. Bacuētsēcsho min matsesēn Nuquin Papan chiaidquoio mibi chuibanēdash. Aidēn chiaid tantiaquid icquin Esusēn chiapadomboen nate bunquin ěmbi chiapadomboen mimbi chuibantsiac. ⁷Con tsusedpabon ambembi chiampidbēdta nēbi matsesēn adembidi ambembi chiaid tantienda. Nuquin Papan chiaidquoio niactiapimbo yec bēdambo icte bunquiota. ⁸Aton dada uidēnquoio icmenuec titinquetanequid nuquin matses nec. Esus tantiaquido bēdambo icnuec ¿mitsipadquoio icpec? Nuquin Papa tantiaquieci ambi chiaid niaquenquoio yec bēdamboec tabadquid nec. Adquid unēsash Nuquin Papa yacno nidash bēdamboshē icquid iquendac. ⁹Ēbi adsho tantiash: —Abimboen caic —queta. ¹⁰Adec: —Abi yacno abēdi tabadendabi —quequin Nuquin Papan

chiapadomboen ěnenquoio icquin nanuna. —Esus tantiaquid unēsacsho cuidenquoio icquin unēstiapimbo icquidēn Nuquin Papan abēdi tabadmendac —quec chieshtoenquoio yec bēdamboec tabadnuna.

¹¹Ēmbi chuiboed chuibanta, mado. —Nuquin Papan chiapadomboen nanuna —quequin chuibanta. ¹²Mibi nēbi caniaid neque. Bēdamboec tabadta, mado. Ēnden caniaidēn: —Nēbi caniaid icquin Nuquin Papan chiaid mimbi tantienquoio iquec —canushe. Bēdamboec tabadta. —Esus tantiaquido utsibotsen ma ěbi yacpadec bēdamboec tabadnu —quiash adta. Bēdamboen chuibanquinc matses tantiaquinc Esus tantiaquinc Nuquin Papan chiaid niaquenquoio icquinc caic bēdamboec tabadta.

¹³Ēbi ano nidabi icnuc Nuquin Papan chiaid adenuidi chuibanta. —Nuquin Papan chiapadec bēdamboec tabadnuna —quequin Nuquin Papan chiaid isbanquin matses chuibanta. Aden bēdamboen tantiameta. ¹⁴Ēnden mibi mamishquin chiondaid ¿ada tantie? Ēnden Esus tantiaquido icquin tsusio dapabon mibi mamishbededondash. Adshobien Nuquin Papan aido mimbi chuibante chuimepondash. Adoac: —Nuquin Papan chiaid bēdamboen chuibanquid Timoteyo iquendac —quequin chuipondash. Chieshtoenquoio yec adquid icta, mado. ¹⁵Ēmbi dada uaquin chuiboedtedi isbanshun ěnenquoio icquin ěmbi chiapadomboen bēdamboen nabanta, mado. —Ēmbi adosho isun ma ěmbi chuibanaidon: “Nuquin Papan chiaid chuibanquidquoio yanosh,” ma ěbi canu —queshun bēdamboen chuibanta, mado. ¹⁶—Nuquin Papan chiaid niacmane —quec mibibi bēdamboec tantiadta, mado. —¿Adabi bēdamboec

tabadpeba? ¿Adambi Nuquin Papan chiaidquio muainquio icquin chuibampoba? —quec mibibi tantiadta. Bëdamboec tabadquin Nuquin Papan chiaidquio ënenquio icquin chuibanta. Aden Nuquin Papan chiapadomboen naic aibëd mibi tabadendac. Mimbi chuibanaidobidi adoaindac.

Esus chuibanquidën bëdamboen chuite

5 ¹Nuquin Papan chiaid chuibanquid icquin dada ënden caniaid chushcainda, mado. —Esus tantiaquidën nadoquid yendac —quequin bëdamboen chui: —Con pabimboecquid nec —quequin. Nëbi caniquid: —Con utsibimboecquid nec —quequin adembidi bëdamboen chuiban, mado. ²—Con tabimboecquid nec —qeshun macho bëdamboen chuiban. Chido machobudabi icquidtedi chibibimboecnuc isquin: —Nëid chudtiadquio icchitebi —quenquio icquin Nuquin Papan chiaidquio chuibanta, mado.

Chido niantembo chiaid

³Tantia, mado. Esus tantiaquidon abëdtan Esus tantiaquid icsho nianten nashunte chuinu. Nianten aton matses nibëdquid: —¿Tsuntsimbini nashumpatsiashba? —quequid Esus tantiaquidon nashunquid. ⁴¿Ada nianten tishaido icpec? Aidëmbi ani nashuntsiash. ¿Ada aton baba icpec? Aidëmbi aton chichi nashuntsiash. Aidëmbidi aton shanuachotsen nashuntsiash. —Ëbi nashundened neque. Nëid nashunu —qeshun nashuntsiash. Aden ambi chiapadomboen nasho isash: —Bëdamboen naic —quetsiash Nuquin Papa. ⁵Padnuc aton matses nibëdquidënquio nianten Nuquin Papa chianequid: —Nuquin Papan ëbi

nashuntsiash —qeshun. —Mimbi ëbi tantiaquieque. Ëbi nashunta, Papa —quequin Nuquin Papa chianequid nianten icsho abëdtan Esus tantiaquidon nashunquid. ⁶Nianten utsimbien ambi tantiaiduidi naic. Petebëdta acteuidi tantiaquin abi bunaiduidi naic. Adquidën unësacimbimboecquid Nuquin Papa tantienquio iquec. Adquid Esus tantiaquidon nashunenquio icquid. ⁷Ëmbi aden nianten nashunte chuiboed Esus tantiaquido utsibotsen chuita, mado. —Aton matses nibëdquid nianten nashunenquio icsho: “Esus tantiaquido icsambo iquec,” utsibon canushe —qeshun chuita. ⁸Aton shubun icquidotsen Esus tantiaquidon nashunquid. Abëd icquido menenquio yec pemenquio yec quec nashumënenquio icquid icsamboshë iquec. Esus tantiesabo icsambo icnubi: —Esus tantiaquid nebi —queboedi Nuquin Papan chiaid niac-niaquec aton matses nashunenquio icquid icsamboshë iquec.

⁹—Nëidtedi chido Esus tantiaquido nashunquidombo iquec —quequin abi cuëmëdquid abi cuëmëdquidquien mimbi dada uaondac. Nadquid chido: —Esus tantiaquido nashunquid icta —cata. Seta dadpenquio 60ted matamec machobudaidquio. Aton bënëuidtsëquid chudmedenedquio. ¹⁰—Matses nashunquid nec —utsibon caid. Bacuë bëdamboen caniuadened machon. Isedanquido bëdamboen isquid. Esus tantiaquido nashundenequid. Matses daicsabudacsho nashunquid. Adec bëdamboec tabadquid: —Esus tantiaquido nashunquid icta —cata.

^{11,12}Utsi nianten machobudabi icquid: —Adquid icta —cainda. —Esusuidtsëquid tantiaquin abi tantiaquido nashunembi —queboedëmbi dada bunquin ambi chuiboedi niacbidansho isun utsibon:

—Icsambo icquid nec —catsiashe.

¹³Adquid shubu utsin shubu utsinquien isedben-isedbenec uspumbo yanash onqueteuidtsèqui buntsiash. Utsibo icsauidi chuibenequidquo ictsiash.

¹⁴—Adquid niant machobudabi icquid dadan bedac bēdambo ictsiash —caimbi. Adoac bacuē tishoatsiash.

Adshun codocaquinc sicaquinc daēdcaquinc catsiash. Adec bēdamboec tabadsho: —Icsambo icquid nec —Esus tantiesabon catiapimbo ictsiash.

¹⁵Adquid niant machobudabi icquidēn utsin-utsinquien Esus tantienquo yanshun Satanasēn tantiamiacpadomboen nac caosh.

¹⁶Niantebēd icquid utsi ĩada Esus tantiaquid chido icpec? Aidēmbi niant nashunac bēdambo ictsiash. —Ĕmbi nēid nashumbanuc niant utsi aton matses nibēdquidquo Esus tantiaquido utsibon nashuntsiash —qeshun abēd icquidēn nashunac bēdambo ictsiash.

Esus tantiaquido chuibanquid chiaid

¹⁷Tantia, mado. Esus tantiaquidon abi chuibanquid nashuntetsen mibi chuinu. ĩAda Esus chuibanquidēn bēdamboen naosh? Adquidēn Nuquin Papan chiaid bēdamboen tantiamequinc Esus bēdamboen chuibanquinc casho ambi chuibanaidon bēdamboen isquin nashunquid. —Ma penu —qeshun menequid. ¹⁸Adembidi chuiquin Nuquin Papan ambi chiaid dada uamepampic. “‘Penushe,’ qeshun adosbitsecquid bitsi secamenuen manemiaid baca bēnē utsibon dēnēshquid. ‘Adec chonoadquidēn ma penu,’ qeshun isadaidbon dēnēshesa,” quequin Nuquin Papan dada uamepampic. Nadembidi Nuquin Papan chiaid dada uapampic. “‘Naic cho. Mibi bēdamboen cuidquin menenu,’ cac chonoadsho abi chonoa uaquidēn menequid,” quequin Nuquin

Papan chuiampic. Adembidi Esus tantiaquidon abi chuibanquid nashunquid.

¹⁹Padnuc Esus chuibanquid caic: —Nuquin Papan chiaid niac-niacsho isombi —quequin matses abentsēcshun chuisho: —Abimboen cachitec —cainda. Daēdshun chuisho: —Abimboen cachitec —cata. Adembidi abentsē chotsecquin chuisho tantiata. ²⁰Esus chuibanquidēn Nuquin Papan chiaid niacacsho: —Mibi icsaoc. Padi icnuna —cata. Esus tantiaquido dadpenshun tantianubi adota. —Aden chuisho tantiash dacuēdec: “Ĕbitsen adembidi chushcapanundac,” qeshun ma utsibon Nuquin Papan chiaid niaquenquo icnu —qeshun chushcata.

²¹Esuquidistubēdtan Nuquin Papan nuqui isec. Adembidi Nuquin Papan abi yacnoshon uaido mayan bēdabon nuqui isequē. Ĕmbi chuibocpadomboen nata. Min matsesēn mimbi tantiaidēnquiobi Nuquin Papan chiaid niacacsho adembidi chushcata. Shubu utsinquidon Nuquin Papan chiaid niacacsho adembidi. —Con matses Ĕmbi tantiaidquo neque. Chushcainquo iquēmbi —cainda.

²²Nuquin Papan chiaid chuibanquid icmenuen nuqui naondacpadomboen badedquo mamishenda. Ambi naid yuen isquioshon ambi chiaid yuen tantiaquioshon: —Bēdambo icquid nec —quequioshon nata. —Esus chuibanquid icta —mimbi badedquo caboedēn Nuquin Papan chiaid badedquo niacsho isash: —Ambi: “Adquid icta,” caidbēd Timoteyo icsamboshē iquec —utsibo quenushe. —Ĕbēdtan chuibanquid icta —badedquo cainda.

²³—Daicsabudteniaccosh. “Pucu paēmbō yan-yanebi,” quiosh —quiosh mibi caic, mado. Acteuidi acashien mibi

niaque. Actequid utsi paëmbo icquid pistsëc ac ma pucu bédanuequin.

²⁴Tantia. Mibi padpiden chuinu.

—Ēbëdtan namembi —canuen matsesën naid bédamboen tantiaata. Utsi aton matses ismec icsasho: —Icsambo icquid nec —badedi catsiash aton matsesën.

Utsibic ismenquio yec icsasho:

—Icsambo icquid nec —quequin badedquio tantienquio icquin yuecshun istuidshumbi adotsiash. ²⁵Utsien ismequin bédamboen nasho:

—Bédambo icquid nec —badedi catsiash aton matsesën. Utsimbic ismenquio icquin bédamboen nabansho: —Bédambo icquid nec —quequin badedquio tantienquio icquin yuecshun istuidshun adembidi tantiatsiash. Ēbi adsho tantiashun: —Nuquin Papan chiaid chuibanquid icta —badedquio cainda.

Matses yuaido chiaid

6 ¹Matses yuabo Esus tantiaquido icsho naden chuita. —Min icbo Esus tantiesa icsho bédamboen isquin ambi chiapadomboen nashunta. “Pabadon chiaid icsambo iquec. Ambi Nuquin Papa caidtsen icsambo iquec,” quequin icsamboen chuinushe. Min icbon chiapadomboen nata —quequin yuabo chuita. ²Utsibi chuiquin: —Min icbo Esus tantiaquidbidi icsho: “Ēbipadquidi nec. Ambi chiapadomboen natiapimbo iquebi,” cainda. “Ēbipadquid icsho aid tantiaquin con icbon chiapadomboen nanu,” quequin min icbo bédamboen nashunta —quequin yuabo chuita. Ēmbi chuiboedtedi Esus tantiaquido chuiban. —Adota —quequin chuibanta, mado.

Piucquid bunquin utsibon ambembi chiaid

³Mimbi: —Nuquin Papan chiaid niaquenquio yec bédamboec tabadnuna

—quequin Nuquin Icbon chiaidquio chuisho: —Aden chuisho tantiatiapimbo iquebi —quequin ambembi chiaid chuiquid icsambo iquec. Adquidën chuisho tantienda, mado. ⁴Aden icsamboen tantiaquidën: —Ēmbi chiaiduidtsëqui bédambo iquec —quequin icsamboen chuibanendac. —Mimbi icsamboen chuinuc ëmbimbo bédamboen chiec —quec chushcanantiaquido iquendac. Abembi onqueteuidi bunendac. Adquid yuec onquesho tantiash: —Utsi onquetiapimbo icnuc abentsëqui onquebudec —quec utsibo nëishendac. Adquidbëd chushcananec muauananec icsamboec tantiashunanendac. ⁵Pabiate shëcuë nibëdacbimboen Nuquin Papan chiaidquio bédamboen tantienquio yec chushcananendac. Nuquin Papan chiaid chuibanquidën piucquid dadpen bedte danec chuibanquidbidi ictiadquio iquendac.

⁶Nuquien Nuquin Papa tantiaquieç bédamboec tabadec nuquin na dadpen bedte bunenquio yec bédambo ictsiac.

⁷Tishac chucactsëcnuc nuquin na nibëdpanëdash. Adembidi unësqin nuquin na nuqui buantiapimbo iquec.

⁸Nuquin pete dashcutebëd icnuc utsi bunenquio yec bédambo nuqui ictsiac.

⁹Piucquid dadpen bedshun dadpen dayun uate bunquido Esus tantiauidtsash badedi chieshtotsiash. Abi bunaiduidquio bednuen mëmunenquio icquin icsamboen nabantsiash. Aden Nuquin Papan chiaid niac-niacquin icsamboen naic quenenash adenuidi naic unësash icsambo icquido cuidacno nidendac.

¹⁰Adec piucquid natiambo bunquido aid bednuec baded-badedquieç icsadenendac. Adquido: —Esus tantiembi —queboedobi padenquio yanash: —Esus tantienquio yanchitombi —quec natiaic tabadendac.

Bëdamboec tabad, quiaid

¹¹Mibi Nuquin Papa tantiaquidquio neque. Piucquid bedteuidi bunenquio yec bëdamboec tabadte bunquiota, mado. Nuquin Papan chiaid niaquenquio yec chieshtoenquio icquin Esus tantiata. Matsetsen tantiec nëishëmënenquio yec bëdamboec tabadta. ¹²Utsibon chieshënaqui chieshtoenquio icquin Esus tantiaquieci bëdambo icta. Unësash Nuquin Papabëd tabadnuec adta. —Con Mado Esus tantiaquieci unësacsho ëbëdi tabadmendambi —qeshun Nuquin Papan Esus tantiamiac mimbis Esus tantiabempondac. Adshumbic: —Nuquin Papan Mado Esus tantiaquiemi —quequin matses dadpen mimbis tantiamiondaque. Adembidi aid tantiaquieci bëdamboec tabadta. ¹³Abitedi uampidën Nuquin Papan nuqui isequ. —Adquid nebi —quequin ancanquid dapa Ponsio Pidato chieci dacuëdenquio icnëdaidën Nuquin Icho Esuquidistuntsen nuqui isequ. ¹⁴Esus tantiaquin chieshtoenquio icquin aidën naidquio chuibanta. Nuquin Icho Esuquidistu choabi icnuc ëmbi chuiboed niaquenquio yec bëdamboec tabadta. —Esus tantiaquido icsambo iqueci —utsibo quetiapimbo icnuc adta. ¹⁵Nuquin Papan tantiacpadënquio aid ushëmbi Esuquidistu nidaidën padpideci choendac. ¿Esus chomequid mitsipadquio icpec? Icsaisambo yec bëdamboshë icquid nec. Aid abentsëcquiobi abitedishun Icbombo nec. Aidëmbi chuiquid utsibo abitedi namendac. Aidquio chuiquid utsin dëniactiapimbo iquendac. ¹⁶Aid abentsëqui unëstiapimbo icquid nec. Bëchamauanquiecscho istiapimbo yec utsibo tabadec. Aidi matsesën

istiapimbo icquid nec. Adquid icsho: —Mibiuidtsëqui abitedishun Icho yec mibi bëdamboshë iqueci, Papa —quequin Nuquin Papa chianenuna ënenquio icquin.

Aton na dadpen dayun uaquido chiaid

¹⁷Aton na dadpen dayun uaquido naden chuita, mado. —“Con na dadpenquioshë icnuc ëbiuidtsëqui bëdambo iquebi,” quenda. Nibëdantiapimbo icquid danquin mimbis dayun uaiduidtsëqui tantienda. Nuquin Papambo tantiaquiota. Aidëmbi matses bëdambo icmenuen aton na bedmec —cata. ¹⁸Adquidobidi chuiquin: —Bëdamboec tabadquin utsibo nashumbanquiota. Adembidi cudasenquio icquin mitsana utsibo menianeta. ¹⁹“Mimbis bëdamboen naoque. Ëbëdi tabadmequin mibi bëdambo icmendambi,” Nuquin Papa camenuen adota. Adash unësacsho Nuquin Papan abëdi mibi tabadmendac padpideci unëstiapimbo icnuc —quequin aton na dadpen dayun uaquido chuita.

Pabadon ënquin chiaid

²⁰Ëmbi chuiboedquibidi adembidi bëdamboen chuibanta, mado. Nuquin Papan chiaid chienquio yec abembi onquesho tantienda. —Bëdamboen tantiaquin abimbo caimbi —quequidobi muasho tantienda. Adquidobëd chushcananenda. ²¹Aden icsamboen chuisho tantiashun: —Abimbo caic —quequin utsin-utsinquien Esus tantienquio yanondashe. Adquido tantienda. Chieshtoenquio icquin Esusquio chuibanta. —Nuquin Papan con mado bëdamboen isplashun —quequin mibi tantiembi. Padi. Aidedi chuiquin dada uaombi.